


Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di
Firenze.
CFMAGL 1.6.242/a





Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di
Firenze.
CFMAGL. 1.6.242/a



Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di
Firenze.
CFMAGL. 1.6.242/a



Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di
Firenze.
CFMAGL. 1.6.242/a

1. 6. 242 137-4

THOMÆ BARTHOLINI
ORATIO


In Obitu.

Clarissimi Viri

D. HENRICI
FUIREN

Medicinæ apud Hafnienses
Doctoris Meritissimi,
Confobrini fui.

HAFNIÆ,
Literis Viduæ PETRI MORSINGII, Reg. & Acad.
Typog. Anno CID IDC LIX.



TH. BARTHOLINI ORATIO

In Obitum

D.D. HENRICI FUIREN
Medicinæ Doctoris.



Nusitatum candoris virtutisq; omnis exemplum nobis orbiq; subreptum in HENRICO FUIRENIO Clarissimo Medicinæ utriusq; Doctore deploramus, cui iusta persolutori, dolendum ne in publica magis calamitate, quam privato amici luctu jure dubitamus. *Æ*stimanti enim utriusq; jacturæ, pacis & amicitiae, fortunæ & virtutis conditionem, illa potior occurrit, cujus damnum est irreparabile, quæq; meliora exempla mortalium animis impressit. *Æ*stuantis quidem belli exempla detestamur, quibus veluti pilæ hinc inde varia fortuna, sed dura semper, jactamur, milleg; miseri involvimur ruinis, cœlo infenso & superis iratis in nostri perniciem conjurantibus, quum ubique proflent miseriarum argumenta, & velut victimæ homines passim immolentur, ut patriam tandem in patria quæramus, & alia opus sit infelicitate ad istam tuendam infelicitatem. Malorum omnium in bello summam contraxit DEUS scelerum vindex, quia nostra scelera vindi-

A 2

ctam

4
Etiam merebantur, & suppliciis nostris acerbæ Numinis
iræ litandum erat, quæ tanto urgent premuntq; vehe-
mentius, quo sunt justiora: Sed tamen, quia pacis tan-
tum causa ex Platonis sententia suscipiendum, mediis bel-
lorum fluctibus haud dubia spe erigimur, quod pace post-
liminiò nobis restituenda, aliquando sit terminandum,
quodq; vitiis cessit, virtute possit revocari. Quis verò
integros illos mores reducet, antiquam constantiam &
candidam mentem, quibus cum FUIRENIO ivimus nu-
per exsequias? Vellem nobis blandiri, si possem, si se-
culi iniquitas pateretur. Prona jam mihi in pejus fides.
Mala multa patimur, sed majora vel experiemur vel me-
rebimur, quia exulat candor, proscripta ex animis recti
veriq; voluntas, in DEUM hominesq; amor, & quidquid
deniq; beatos nos reddit & felices, laudare malumus quam
imitari. Bellorum finem prævidemus, sed nunquam vi-
tiorum quæ insanabilia, quia ferro exasperantur. Nos
igitur publicis his ærumnis irretiti, quibus se subtraxit
præscia futurorum FUIRENI mens, tantum virum
privatim sed publico quoq; nomine grata in beatos ma-
nes recordatione deflemus, quod vitæ tædio inter maxi-
ma mala existimaverit vivere, moriq; maluerit natus di-
vinâ, quam didicerat arte, mortales servare, quam inter
vivos quotidiana funera intueri, & perversos mores.
Utinam eo amico diutius frui licuisset, ut tantarum vir-
tutum commercio publicis facilius incommodis suffice-
remus, quibus tantò urgentius premimur, quo acerbior
est doloris magnitudine amici memoria. Ego tot an-
norum itinerum studiorumq; comes, sanguinis vinculo,
sed majori amicitiae veritatisq; jure obstrictus, commit-
tere nolui, ut beati FUIRENI & in publicum & in
me merita, totq; illustres virtutes, quibus velut gemmis
vita ejus insigni fulgore coruscavit, alta oblivione sacri
vatis

5
vatis defectu sopirentur. Pauca ex multis libabo, quia
cuncta paucis pagellis comprehendere, nec mea tenui-
tas nec fecunda bonis exemplis FUIRENII vita patitur,
in qua sola beatissimæ vitæ habuimus compendium. Plu-
ra tamen dicturus sum, quam voto conceperam. Enim-
verò, quod si ipsum redivivum quotidie intueri, & velut in
speculo non fictam virtutum maximarum speciem admira-
ri in superstitie liceret, jucundius opera hac superfede-
rem. Nunc quia nobis fata Virum inviderunt, penè
dixerim, virtutem omnem ex mortalium contubernio cum
illo abduxerunt, in hoc erimus facundi, ut præ multitudi-
ne excellentium virtutum vel minima dicantur. Nota
narrabo, à primis tyrocinii annis consuetudine mihi per-
specta, quorum fidem non commendabo Lectoribus, qui-
bus vel FUIRENII virtus, vel nostra fama innotu-
it, ego insuetus mentiri, ille nec mentientes ferre.

Sicco pede præclaros FUIRENII natales præter-
irem, nisi & hi inter virtutis argumenta essent, quibus in-
flammati posteri, ad gloriam concitatori cursu grassan-
tur. Non terræ filius fuit noster, sed ex familia Asclepia-
dea satus, Patre Medico consummato sed extra seculi fa-
stum D. Georgio Fuirenio, Botanico & Chymico nulli se-
cundo, Matre verò Matrona incomparabili Margaretha
Finchia, summi Medici D. Thomæ Finchii, Avi nostri,
filia lectissima. Dies erat XXVIII. formosissimi Maij, quar-
to decimo seculi currentis anno, quo lucem primam vidit
beatus FUIRENIUS, & primam parentibus lauda-
tissimis, Avoq; Paterno tum adhuc superstiti, Spectatissi-
mo Viro Henrico Fuirenio seniori, spem & expectatio-
nem concitavit, quam cum ætate egregia pueruli indoles
indies exauxit confirmavitq;. Eluxere enim in prima æta-
te haud obscura indicia, quibus & se tantis parentibus dig-
num assereret, & sequuturæ vitæ præclarum initium face-

ret. Ab utroq; Avo, rarissimo & venerando senum pari, gravitatem primis annis didicit, à Patre Doctissimo literarum semina, à Matre, qva nihil inter foeminas sanctius, cum ipso lacte pietatem, probitatem cœloq; dignas virtutes cæteras imbibit, ex omnibus compositos mores & vitæ integritatem, qvam semper servavit, laudabili æmulatione expressit animo & concepit. Haustis domi à severis magistris studiorum fundamentis, altius postea aliis se nequitquam immerfit, quibus ad ornatum potius quam utilitatem eruditi utuntur, sed qvum artem longam, vitam perbreve ex Co intelligeret, statim patriæ Academiæ initiatus, initia meditabatur artis ad quam naturæ quadam propensione & parentum exemplo ferebatur. Tantum tamen aliis indulgit, ut lingvis Latina & Græca, scientiisq; Philosophicis, inprimis Mathesi, esset abundè ad eruditionem Medicam instructus. Et hæc & illa acriter urfit auspiciis beati Parentis nostri, in cujus familia per tempus vixit, moxq; morienti adstitit, & fideli operâ Magni Avi sui Thomæ Finchii, cujus convictu postea & eruditione quotidie utebatur, deniq; consiliis D. Olai Wormii Affinis & M. Jacobi Finchii Avunculi, plurimum adjutus, quorum omnium ductu tantum profecit, ut capacior animus per latiore orbis campum esset explicandus. Itaq; Soram cum Parente nostro & fratre seniore Bartolo Bartholino concessit, ut D. Joachimo Bursero Celebris Floræ Amasio, familiarius innotesceret. Nunquam eo fuit animo, quo multorum stultitia pervenit, quibus patriæ bona forident, & externa quæcunque singulari se fuco adornant. Famam & eruditionem magnorum Medicorum, qui ea tempestate in patria nostra eminuerunt, Finckii, Wormii, Arnisæi, Fabricii, Burseri, Laurenbergii, Fossii, Pascasii, Sperlingii, Severini, Lælii, aliorumq; suspexit semper & ad imitandum serio, nec infelici successu elegit.

7
git. Insigni Parente suo præmaturè orbatus, ab aliis hau-
sit scientiam, qua ad stuporem domi ille abundabat, filioq;
eandem inievisset, si mors non intervenisset, magnis ini-
mica conatibus. Posteaquam Soræ Clarissimo Burseri
succo victitasset, propter Epidemiam luem, quæ patriam
depopulabatur, & Excessum Parentis nostri Caspari Bar-
tholini, ad suos reversus alios soles meditabatur, quibus
ulterius inclaresceret virtus domi spectata. Belgium
primò adiit, & in florentissima Leidenfium Academia, vi-
cinisq; bonarum literarum emporiis, quatuor annorum
decurfu universum Medicinæ stadium absolvit. Cadave-
rum sectionibus apud Adrianum Falcoburgium, nitidum
Profectorem, vacavit, Botanica sub Adolfo Vorstio Flo-
re genio & Polyhistore excoluit, crebrisq; excursionibus
inquilinas Bataviæ plantas collegit, Praxin auspiciis Ot-
tonis Heurnii & Ewaldi Screvelii exorsus, Nosodochium
frequentavit, & duce Joanne Walæo Medico subacti judi-
cij singula accuratiori cura percurrit. Subindè Amste-
lodami summos in arte secandi & medendi Magistros Ni-
colaum Tulpium & Zacutum Lusitanum audivit invisitq;
Franeckeræ nonnunquam studia sua Menelao Winshemio,
notæ famæ Medico, submisit. Trajecti quoq; ad Rhe-
num, cujus solenni inaugurationi interfuit, Henrico Re-
gio, Reimero, aliisq; raræ doctrinæ Professoribus inno-
tuit. Enchysæ deniq; Paludani Musæum, Naturæ illud
Theatrum, curiosis oculis perlustravit. Ubiq; hoc egit,
ne locatæ operæ temporisq; pœniteret, ab omnibus quos
eruditio Medica evexit, mutuatus est, quod arti suæ sciret
profuturum, & ubiq; modestiæ, candoris & insignis do-
ctrinæ famam post se reliquit. Maturus deindè erudi-
tione & judicio ad Gallos abiit, cultissimam gentem, ut
officiosam linguam amplioremq; doctrinæ proventum sibi
compararet. Lutetiæ in scholis Medicorum discendi cupi-
dus

dus frequens visēbatur, in Theatro Anatomico Medicorum & Chirurgorum assiduus erat Dissectorum spectator, privatoq; cultro exta animalium evoluit, in Nosocomiis instructissimis variorum morborum historias vidit & curationes, sub Davisonio Chymico Clarissimo arcana Naturæ ignis artificio sollicitavit & invenit, Hortum Regium variis plantis sub Dn. de la Brosse magnificè nuper instructum, amore Floræ sæpiculè ingrediebatur, & quicquid deniq; ad artis suæ perfectionem ubiq; in urbe vastissima extabat sine tædio viarum aut sumptuum avidissimo animo venabatur. Reliquas Galliæ Provincias eadem solitudine percurrit, non tam videndi studio, quod plurimis sufficit, quam ut naturæ varietatem in elegantissimo imperio, & Doctorum de singulis judicia exquireret. Bone DEUS, quam turpiter hic alii se dare solent, qui terras oberrant, veluti pecora, luxum peregrinum tantum sectantur & ad suos referunt, neglectis præclaris gentium institutis, sola vitia, habitum peregrinum, & peregrinos morbos pro usu patrio mercantur. Rectius domi manerent illi, & focum patrium instruerent. Oceanum, ad quem sanctius vivitur, suis moribus inficiunt, & dum alienos errores imitantur, propriæ pœnæ miserè succumbunt. Noster FUIRENIUS ubiq; incorruptos mores servavit. Vitia aliorum vidit multa, sed correxit & execratus est, omniaq; præclara amplexus didicit in peregrinatione servare modum. Peccant enim & illi, qui nimis curiosâ diligentia per omnia vagantur, quæq; multi scire debent, soli volunt. Non omnia mens humana capit, & omnium intervenire secretis in peregrinatione periculosum. Id per universam vitam FUIRENIUS egit, ut sine ulla Polyhistoris ambitione, sola illa sectaretur modestissimè, quæ maximè facerent ad Medicæ artis complementum. Pluribus illam temperantiam optaremus, qui uni-

universum ingenio suo meriuntur, & intra diligentiae suae ambitum constringunt. Fastidientis stomachi est, omnia Apicij fercula degustare, quae inquinant corpus, non alunt. Ut ciborum, ita & doctrinae suus est modus. Nimia eruditio onerat, moderata prodest. Hinc, dum omnia nonnunquam nimia sciendi aviditate sectamur, quae necessaria sunt vel negligimus vel non assequimur. Latè patet Medicinae campus, per quem decursurus, caveat ne vel nimis sarcinis oneri succumbat, vel serius tardiusq; iter aggrediatur. Antiqui amplitudinem artis emendaturi, ut singulis pares essent, singulas partium affectiones suis Medicis assignarunt. Nostro seculo omnium particularum salus uni Medico incumbit, qui vix partibus suis ex voto aegrorum defungetur, si per varia Criticorum, Historicorum, Antiquariorum, Philosophorum, Politicorum, Ictorum, Theologorum studia nimio temporis dispendio & audaci temeritate fuerit divagatus. In immensum quoq; crevit Medicorum inter nostros scientia. Anatomes, Botanices & Chymiae amplitudo, & novorum morborum infelix ortus, potiore hominis aetatem solitariasq; curas requirit. Itaq; accuratum FUIRENIUS cum studiis calculum subduxit, & neglectis in itinere quisquiliis seriora Medicorum apprehendit. Quo animo ab itinere suscepto ad Montem Pelium deflexit, illustre illud Medicorum domicilium, ubi copiosius per campos suas opes Flora & ornamenta spargit, & in urbis horto luxuriat. Gratâ praesentia Fr. Ranchini & R. Bellevali Medicorum in orbe notorum favorem ibidem meruit, & Catellanum celebrem Compositionis Alkermes Dispensatorem convenit. Marsilia Genoam vectus, per Liburnum, Pisas, Florentiam, & Bononiam, Patavium appulit, quam studiorum optatissimam sedem sex annorum spacio sibi delegit. In fa-

B

mi-

milia Joannis Rhodij Polyhistoris & Medici, maximo Reipublicæ Literariæ damno non ita pridem defuncti, ex cuius familiaritate quotidiana tantum discere potuit, quantum frustra alibi passimq; per orbem quævisisset, cum fratre Thoma Fuienio, Viro Eruditissimo, naturæ artisq; Medicæ abditis nocturna diurna; industria se immerfit. Ingentes conatus juvit Joannis Veslingii in dissecandis cadaveribus dexteritas, & in Creticis Plantis facundia, quem etiam ad Baldi montes amicum comitabatur. Magna Veslingij erat fama, & major eloquentia, quam accurata manus comitabatur. Quum duraturo ad omnem memoriam operi Anatomicas figuras per cælatorem ex vivis cadaveribus exprimendas adjungeret, præter FUIRENIUM nostrum, me & Leonicenum admisit neminem. Eodem Joanne Leoniceno, artis perito, præeunte homines animaliaq; privatâ manu FUIRENIUS evisceravit, & artificiosas venarum, arteriarum & nervorum, magna cura ex unius hominis cadavere exsectorum, tabellas stupendo opere exstruxit, patriæ Academiæ destinatas. Chirurgicas Operationes apud Petrum de Marchettis, unicum Aquapendentis discipulum superstitem, manu promptum & consilio, accuratè perdidicit. Chymiam cum J. Zwelfero, domestico tum nostro, jam benè de Re Pharmaceuticâ merito, recoluit. Consultationibus gravissimorum Medicorum Benedicti de Benedictis, Jo. Dom. Salæ, Benedicti Sylvatici, Jo. Veslingij, Fr. Frigimelicæ, aliorumq; subcissivas horas impendit, & perpetuus Exercitissimi Medici Jo. Dom. Salæ laudati erat comes, cuius senis favore & incredibili humanitate ad omnes agros cum illo admittebamur. Referebat ad Diarium singulorum ægrotorum affectiones, causas morborum, signa, curandi Methodum, remediorum formulas à sene nostro præscriptas, deniq; eventum, qua exercitatio-

tione nihil ad rectè feliciterq; medendum utilius, qvum
 frustrà in universalibus scientia nostra occupetur, nisi in
 Cajo vel Titio exerceatur. Bibliothecæ interim illustris
 Nationis Germanicæ cum laude præfuit, resq; ejusdem
 tantâ prudentiâ, Consiliarij titulo, administravit, ut om-
 nium applausum meruerit, & supremum in Gymnasio
 Patavino magistratum obtinuisset, si à modestia ejus id
 impetrare potuissèmus. Cæterum gloriæ contemptor
 maluit honores mereri, quam accipere, & qvanqvam ci-
 vili abundaret prudentia, eruditioneq; Medica excelle-
 ret, nunquam tamen vel inde laudem, vel hinc lucrum am-
 bivit. Sibi maluit privatim vivere & cum sapientia ha-
 bitare, quam publicæ omnium se invidiæ exponere. Fe-
 licius degunt, qui hac animi moderatione vitam qvieu-
 tam sine ambitu ducunt, verè illi vivunt, nec spiritum
 ab aliis præcariò trahunt. Honores declinare quos me-
 remur, magnæ opus est prudentiæ, majoris tamen seip-
 sum prudenter sine fastu gerere, & sua felicitate conten-
 tum sibi ipsi imperare. FUIRENIUS noster sibi
 oblatum honorem Naturæ artiq; Medicæ detulit, dum
 spretis aliorum superbis curis, honorumq; blandimentis
 unius veri utilisq; investigationi sese unicum addixit, ut
 sciret penitus naturæ proci, quid sinu interiori condi-
 derit natura, quid amassis suis aperuerit, quid de natu-
 ræ vitijs & morborum incantamentis vel usus probave-
 rit, vel majores tradiderint. Utrumq; in prolixo itine-
 re quæsit & invenit. Majorum juniorumq; Medico-
 rum placita ex editis monumentis investigavit, quæ tan-
 tâ curâ tantoq; delectu passim in itinere & patriæ reddi-
 tus congescit, ut pauca in orbe medico huic Bibliothecæ
 conferri possint. Naturæ varietatem & insolitos mor-
 borum casus fedulâ inter itinerum molestias invenit ex-
 ercitatione. Hac mente animatus, qvum diutius mo-

ram utilem Patavii traxisset, reliquas Italiae urbes data oportunitate perlustravit. Venetijs Cœcilij Folij Anatomici & aliorum conatus publico dedicatos expendit. Bononiæ, Fortunij Liceti, Philosophi tum eminentis, postea primi in Gymnasio Patavino, Sala defuncto, Professoris Medici amicitia se insinuavit. Ibidem opera Barth. Ambrosini in Musæum Aldrovandinum admissus Naturam variam venerabatur. Florentiæ Magni Ducis Etruriæ officinam Chymicam & alia visu digna invisit. In urbium Reginâ Româ benevolè ab Equite Illustri Cassiano à Puteo, naturæ & antiquitatis promocondo exceptus, eruditos P. Athanasij Kircheri, utiles Pauli Zacchiæ, & curiosos Petri Servij labores admirabatur. Neapoli Chirurgorum Principem Marcum Aurelium Severinum, hospitem olim nostrum sibi demeruit. Inde Vesuvij vidit ignes, thermas Puteolanas, fontes Tiburtinos, & quicquid rarum aliisq; terris invisum florentissima Italia exteris solet monstrare. Omnium singulari amore tenebatur & de natura sollicitus, visis Imperati Neapolitani & Calceolarij Veronensis naturæ thesauris, ipse collegit quicquid hinc inde illustre spectantium oculos animosq; exfatiat. Digna profectò severis ingeniis diligentia, unde pressius naturam velut nudam & sine velo intuemur. Ludunt illi operam, qui Naturam inter Sophistarum tricas & disputationum contentiones quærunt. Monstrari debent hæc, non disputari, & sexcentis Sophistarum distinctionibus ne culicem æstate mediâ profligaveris. Pessimè se prostituunt multi, qui pleno ore de plantis certant, de animalibus disserunt, de Metallis commentantur, de natura Rerum litigant, & si ad rem ventum fuerit præter olus & asinos norunt nihil, quia in cerebro naturam formant, & ingenij acumine constringunt. Inspicienda ipsa Natura ut intelligatur,

tur, & sensibus investiganda, quæ sensibus capiuntur. Ingredere Musæum FUIRENI, quicumq; Philosophi nomen inanibus altercationibus ambis, ut Philosophus egrediaris, discasq;, quod ignoras, aliud esse naturam nosse, aliud rationem. Videbis ibi artificiosas ossium humanorum omnis ætatis compages, nervorum venarumq; speciosas tabellas, metallorum genera, mineralia, terrarum varietates, gummata, lapides suis classibus per species distinctos, animalia peregrina, monstrosos pisces, serpentum exuvias, lacertos squamosos, insecta variegata, miras concharum facies & infinita alia Naturæ ludentis miracula, ex quibus ad publicum commodum & solidam eruditionem plus erues, quam ex mille libris, aut bis mille disputationibus. Hisce in itinere accuratè conquestis domiq; postea digestis, animum verâ Naturæ cognitione imbuunt FUIRENIUS & per omnem vitam insigni voluptate pavit. Hoc Medicæ doctrinæ thesauro, usu rerum præclararum, selectissimorum librorum & universæ Naturæ copiâ instructus, velut amplis spolijs, relictâ Italiâ per Parmam, Placentiam, Mantuam, Mediolanum, perq; Alpes invios cum fratre Theodoro Fuiren, illibato illo pectore, Helvetos salutavit masculam & cordatam gentem, inprimis Basileæ, laude medentium claræ, videndi desiderio tenebatur. Summa humanitate Medicinæ Proceres, Emanuel Stupanus, Jo. Jacobus à Brunn, Jo. Casp. Bauhinus, Felix Platerus Junior, junctos nos exceperunt, utriusq; Parentis memoriâ & amicitia. Passus est hic FUIRENIUS noster se exorari, & à se tandem difficillimè obtinuit, ut antequam patrios revideret lares, exantlatorum laborum & solidæ eruditionis Medicæ testimonium, solenni ritu publicè exambiret. Ab omni fastu semper fuit alienissimus, doctusq; maluit esse, quam videri. Ne tamen præter majorum consue-

tudinem sibi diffidere videretur, hoc mecum elegit Bra-
 beuterium, in quo utriusq; Parentes, Avi & affines lau-
 ream Medicinæ supremam reportarunt, ubi cum delectu
 ingeniorum honores digni conferuntur. Igitur Patres
 Basileenses, iusti humaniq; candidatorum censores, audita
 in privato examine FUIRENII in Re Medica
 eruditione, ad publicas Lectiones admiserunt, quas di-
 sputationis vicarias, urgente pectoris necessitate, data
 optione elegit. Hydropem Asciten triduanis prælectio-
 nibus in Medicorum Collegio eo eruditæ caveæ applau-
 su absolvit, ut qui publicam alioquin lucem de industria
 declinaverat, suasu tamen Clarissimorum Virorum typis
 Basileensibus posterorum memoriæ commiserit. Ita
 publico consensu Doctorem mitram diribitore Celeber-
 rimo Bauhino in eadem mecum Cathedra jure meritissi-
 mo Pridie Idus Octobris CIO IOC XLV. obtinuit.
 Gratulabar impensè mihi, quod in partem præmiorum
 admitterer, qui eruditione rerumq; usu libenter illi &
 ex merito cedebam. Sensimus & aliud Doctorum Rau-
 racorum beneficium, quod in Collegium Medicorum
 adoptati Principibus illis Archivis permisceremur. Quæ-
 cunq; FUIRENIO hic & ubiq; consignabantur vir-
 tutum laudumq; documenta, minora meritis censeban-
 tur. Laudari ab omnibus virtus, satis tamen à nemine
 æstimari poterat. Ægrè hinc divulsus, per Solodurum, Ber-
 nam, Lausannam, Genevam, Lugdunum & Aureliam,
 tandem Lutetiam rediit, difficilimis itineribus hyber-
 nis, ubi lustratis revisisq; quæ digna videbantur, inti-
 miusq; cognitis quæ ex usu existimavit, magnam Bri-
 tanniam magnorum ingeniorum feracem meditabatur.
 Temporum verò injuria & bellorum civilium tempesta-
 te faviente, in Belgium regressus, amicis veteri neces-
 situdine conjunctis Vorstio, Walæo, & consanguineo An-
 drea

drea Bickero , Consule Amstelodamensi & Fœderatarum Provinciarum Ordine Illustri, officiosè valere jussis, ad reditum in patriam se mecum composuit. Comite Petro Charisio, cognato nostro honorando, per Frisiam utramq; , Groningam, Bremam, & Cimbriam ad desideratam Matrem & Amicos, ad patriam urbem post decem & trium annorum iter, animo ad rectas spes sublevato properavit. Ingenti doctrinarum & experientiæ supellectile onustus, privatos suos lares redux composuit, sibiq; vixit & amicis. Molestus nemini, omnibus gratus morum integritate & vitæ innocentia ad exemplum stupendæ. Bibliothecam magno passim studio & sumptu collectam erexit, omnium ætatum Medicis instructissimam, & in suas classes ordinesq; disposuit, ut non tam propriis quam amicorum usibus inserviret. Nul- lum enim ex commodo hujus thesauri usu exclusit, nec canis ad præsepe excubabat. Ipse necessarios per vi- ces & temporum indulgentiam revolvit perlegitq; , ut hausta foris Medicinæ arcana, continuis domi lucubra- tionibus perficeret. Consulebatur in dubiis rerum even- tibus, & librorum usuram omnibus literatis amicè con- cessit, sed Medicis; Sicut enim reliqua studia arti suæ postposuit, ita nec ullum in Bibliotheca patiebatur li- brum, qui vel Medicam rem vel Naturalem historiam non complecteretur, Logicorum, Grammaticorum & Criticorum farraginem æversatus. Hoc unum in vita quieta studiosè curavit, ne inutili aliarum rerum vel le- ctione vel possessione seria interromperet, & utilia ob- fuscaret. Ita enim vita potuit æquali & uno tenore pro- cedere, quam alii propositis diversissimis scindunt. Cu- ras seriores horti urbani cultura interpunxit, Dioscori- dis, Theophrasti, Clusii, Bauhinorum studia æmulatus.

Ra-

Rariores plantas & exoticas curiosè collegit, & quotannis conservavit. Et ut corporis falleret imbecillitatem levaretq;, subinde æstivis mensibus in prædio Eberrodiano cum Varrone, Columella, Palladio & Constantino Cæsare rusticabatur. Numerosam agrorum multitudinem nunquam ambivit, commissorum tamen sibi curam habuit diligentem. Quanquam enim ad intima medicinæ admissus in artis operibus esset exercitatus, non concessit tamen corpusculi valetudo pluribus vacare. Rogatus nulli operam suam denegavit. Quos angusta res domi premebat, & consilio & ope subvenit. Nec publicis reipublicæ muneribus inhiavit, quæq; in aliis venerabatur, neglexit ipse, non contemptu sed necessario valetudinis prætextu. Publicam illam servitutem magnæ fortunæ declinavit, ubi nihil ex arbitrio nostro nobis licet, sed sæpius opprimit invidia virtutes. Optima cum lare suo secreto ratio constabat, quem legendo & meditando splendidè ornavit, secumq; ea egit, per quæ posteris profuit. Magnificam à se exstructam in fundo paterno domum, Democriti speluncam esse voluit & naturæ collegium, mutis Bibliothecæ Doctoribus refertum, Musæo raris Naturæ operibus mirandum, hyeme exoticis plantis virescens, avibus personans, semper variis experimentis occupatum, amicorum deniq;, quos constanti & incorrupta fide dilexit, eruditis colloquiis sæpissime illustre. Sobrietate vitam fragilem temperabat, sine libra, sed non sine modo vivens. Parcè prandebat, primo semper ferculo parabilis cibi contentus, ne animo nebulas & corpori pravorum humorum materiam offerret. Inter causas malorum nostrorum est, quod vivimus ad exempla, non ratione ducimur, sed consuetudine. Ille verò egregio suo exemplo sine exemplo contentus, lu-

luxum omnem detestabatur. Legis Oppiæ abrogationem truci magis quam Porcius olim Cato oratione inhibuit, nec unquam vehementius excanduit, quam ob consuetam in conviviis & vestibus patriæ profusam licentiam. Cæteroquin mitissimo erat ingenio, nullos lædere, sed nec lædentes ferre. Famæ popularis contemptor, ita se tamen gessit, ut maximâ famâ inter omnes maximos & medioximos dignus esset. Nunquam silentio involvenda FUIRENIÎ merita, æterna sit beneficiorum illius apud cives nostros memoria, quod in Academiæ ornamentum & civium utilitatem publico testamento instruatissimam Medicam Bibliothecam dedicavit, publicis omnium usibus inservituram, salariumq; illius exauxerit, qui Bibliothecæ curam est habiturus. Legatum satis æstimari à nemine potest, nisi à sapiente, cui notum est, quanti res tanta sit taxanda. Prævit olim Petrus Albertius Academiæ nostræ Rector, & summa prudentia apud Majores spectatus, qui librariam suam supellectilem Academiæ primus consecravit. Crevit numerus clementiâ Augustissimi Regis Divi CHRISTIANI QUARTI. Quibus symbolam contulit Andreas Lymvicius meritissimus in Academia Medicinæ Doctor. Majorum liberalitatem in immensum auxit incomparabilis Episcopus Selandiæ, Casp. Erasm. Brochmannus, cujus nulla ætas delebit apud nos memoriam. FUIRENIÎ verò Bibliotheca, quam non Apollinis, sicut olim Augusti ævo, sed S. S. Trinitatis templo consignavit moribundus, ut ex divinis ingeniorum monumentis, surgens mortalium gloria & salus in DEI T. O. M. tutela esset, primam inter Medicos laudem meretur, quos ingenti librorum rarissimorum numero solos instruit. Quidquid ab antiquis Græcis, Romanis & Arabibus præclari in chartas relatum fuit, quidquid mediæ ævi scriptores de re Me-

C

dica

dica commentati sunt, quidquid deniq; diligens sequentium seculorum industria vel novi invenit, vel ex antiquis inventis stabilivit, confirmavitq;, FUIRENIUS collegit, & æternis studioforum usibus destinavit. Nec in historia Naturali quidquam desiderari voluit, quod hætenus quidem sub incude venit, & ære præcioq; comparari potuit. Defectum publici juvandi promptitudine supplevit frater Thomas Fuienius, cui idcirco immortales gratiæ debentur, quod in omnium seculorum cogitationes admittamur, nec ullo pene medico nobis sit interdictum. Ne verò naturam ex libris solis venaremur, inæstimabili liberalitate ex Musæo addidit secretissima Naturæ miracula & ostenta, quibus colligendis domi forisq; desudavit, sumptusq; necessarios suppeditavit, quibus & indies excrescerent, novorum accessione, & Medicorum Collegium commodius hoc loco hospitaretur. Videmur jam ubiq;, dum in Musæo Academico versamur, provida FUIRENI cura locupletato, quod terrarum omnium & aquarum, animalium hominumq; portenta claudit. Quæ fusa oratione libri adumbrarunt, hic oculis obversantur, quæq; illi conjecturâ investigarunt, nos palpamus, & cum rerum natura in consortium omnis naturæ pariter incedimus. Habet hic quo se Medicus exerceat, quod tyrones discant, quod admirantur omnes, quo nomine tibi, FUIRENI beate, patria universa obstrictam & debendi ream se profitetur. Hæc erunt virtutis tuæ trophæa, hæc publica monumenta, quibus nomen æternitati apud nos posterosq; consecrasti. Nec minus illi Respublica nostra Medica debet, quod in Dispensatorio Hafniensi conficiendo præclaram cum cæteris Medicis operam contulerit, classēsq; ipsi sorte divina oblatas cum laude absolverit. Mirum dictu, quanta alacritate ad publicum bonum promovendum

dum excubaverit. Quidquid egit, seriò egit, præclaro quodam perficiendi impetu. Sententiam in Collegio Medico rogatus, paucis sed quibus pondus inerat, rerum momenta expendit. Nunquam verborum quæsit lenocinia, nec sermones sesamo aut papavere adpersit, sine fucò & fallaciis, sine pompa ulla simplici oratione mentem cordatè aperuit. Et quod in illo excelluit, candore omnes mortales superavit, & seipsum. Plebeja illa exolevit virtus, & ad rus plurimorum calculis ableganda. Felicius tamen singulorum se fata explicarent, si intra domesticos urbis parietes admitteretur. Neminem ille fallere, & fallentes odissè. Cor in fronte gerebat, & pectus apertum, nullis dolis consutum aut fucatum, omnibus patebat. Nullius unquam famæ insidiabatur. Submisit se omnibus, tumq; se maximum inter amicos existimavit, quum minimum de seipso sentiret, nihil sibi, cuncta aliis indulgens. Infra modestiam cætera, quibus gloriari poterat, reputabat. Animo invictus, damna iniquæ sanitatis spartana nobilitate concoxit, nec ullis cessit voluptatibus, ut etiam castis amoribus licitisq; nunquam ab ocio sapientis & animi tranquillitate, cui sacramentum dixit, potuerit dimoveri. Majum, nativitatì mensẽ, perpetuo coluit, quo Romani uxores non ducebant. Noluit libertatem suam incerto Venereo, & si malè ceciderit, impotentix muliebri subicere, quæ subinde domi devicta, in foro quoq; ut ille ait, obteritur & calcatur. Amavit Hippocratem, non uxorem Hippocratis, quæ semper quo modestè coerceretur opus habebat. Amore interim divinæ pulchritudinis rerumq; à DEO creatarum unicè captus, non damnavit conjugia, sed aliis reliquit, posteritatem suam in libris superfuturam ratus, memoriamq; quàm tanti tamen non putavit, inter amicos & inculpatæ virtutis gloriam apud omnes

mnes duraturam. Sécum habitare & vivere, DEO servire & amicis, inter maxima felicitatis dona numerabat. Fortunæ amplissimæ bona, pro suis non computās, quia peritura, cum iis partiebatur, quos vel bona mens commendabat, vel socia paupertas urgebat. Benè precantur alumni, viduæ, Nosodochia, quibus in vitæ subsidium aliquot mille Coronatis prospexit. Optimè de DEO ipso meritis, cujus Ecclesiis ex suo patrimonio, ne migraturo hinc oneri esset, devotè legavit signati argenti summam, velut donarium sacris aris suspendendum. Ita officia cum amicis, bona cum egenis, utrumq; cum DEO divisit, nihil pro suo venditans, nisi infractam vitiis mentem, recti conscientiam & animi constantiam, quam inter peregrinationum tædia, inter langvidi corpusculi injurias, inter seculi fatiscantis perversitatem, semper servavit integram. Hac animi beatitudine & virtutum satellitio, peritura omnia neglexit, frequensq; cum DEO immortali commercium exercuit. Primus in templo vivebatur & ultimus, & Numinis præcepta non ore tantum, sed, quod divinum, vitâ expressit. Immortalia quotidie meditabatur, & ad æternitatem se tacitè composuit. Minabatur à teneris ungviculis corpusculi imbecillitas, casu an ab interna origine, in vitales partes, respirationis difficultatem, quæ per complures annos pectori compresso inimica, crescente ætate, sed decrescen-
tibus viribus, asthma molestum excitavit. Inclementiores hyemes binæ, patriæ exitiosæ, pectori quoq; illius tam fuerunt molestæ, ut ætatis animæ meatibus vix spiritum liberè duceret, quo tandem in patriæ urbis obsidione & publica calamitate, auctis injuriarum asthmatisq; causis, sensim intercepto, anni currentis initio, ætatis verò XLV, inter mortales defuit

fiit esse mortalis. Nos tibi, beatissime FUIRENI, felicitatem, qua cum Patre & fratre Theodoro, heu quondam nostris, in cœlo frueris, non invidemus, sed nostram infelicitatem deploramus, & tui memoriam colimus. Manent in animis nostris admirandæ dotes, inusitatæ virtutes, in publicum merita, incredibilis tuus in nos amor, & desiderium testamur. Virtutis omnis in Te vidimus exemplum, nec sequi possumus. Ignosce quæso, beatissima anima, quod parcius tua, nec pro dignitate satis expresserim. Vita tota, modestia fuit, nec laudari Te æquo animo es passus, & dum omnia animo complector, sub singulis hæret lingua, tuis colloquiis assueta. Quia verò pietatis meæ extare volui monumentum, si in singulis penna defecit, universa condonabis, & dolori iusto tribues, quicquid meritis tuis decessit. Nos interim dum inter æterna sidera fulges, malis innumeris, quæ effugisti, succumbimus, seculi iniquitate, quam superasti, premimur, & fato, quod spreveristi, debemus ludibrium. Ego & hoc nomine infelicior, quod inter extrema tua ultimum vale forte absenti non dixeris, quem in itineribus habuisti comitem, in studiis socium, in amicitia parem, ubique fratrem.

DIXI.


C 3

PRO-

PRO-RECTOR
 REGIÆ HAUNIENSIS
 UNIVERSITATIS
 CHRISTIANUS
 OSTENFELD

Medicinæ Doctor & Professor Publicus

Lectori Salutem.



Uod in magnâ publicâq; calamitate accidere plerumque solet, ut damni gravitate perculsus dejectusq; animus, quid factu sit opus, non videat, neque quid primum agendum, quidvé omittendum, possit dignoscere; id evenisse comperimus octavâ ineuntis anni die, auditô lugubri nunciô de præmaturo à nobis discessu Viri omni honore & laude dignissimi, D. HENRICI FUIRENII, cujus vel ipsô commemoratô nomine excelsa quædam & præclara eruditionis virtutisq; species cogitationi audientium menti; occurrit. Etenim omnis ætas, ordo, sexus sentiebat multas gravesq; sibi esse lugendi causas. Egeni Sola-

S
S
ub-
nita-
lamni
imus,
neque
irren-
com-
muniō
t lau-
cujus
præ-
enti-
tens
geni
ola-

Solatum; Viduæ Benefactorem; Ægroti Medicum; Literati Fautorem; Familia Ornamentum; Optimique pietatis, innocentiae, candoris, prudentiae, mansuetudinis, modestiae, omniumque virtutum perillustre exemplar seculo ereptum dolebant. Utinam ea nobis esset dicendi facultas, quæ laudibus ejus condignè enarrandis sufficeret, quaque ille gratiâ universos Christianæ vitæ actus peregit, eadem & nos facilitate possemus eximias ejus virtutes commendare posterorum memoriae; Certè Medicum omnibus numeris absolutum, Civem cum cujus vitæ conjungebatur plurimorum salus, Virum in Patriæ commodum & ornamentum natum, describeremus. Nunc autem, quum tot ac tanta se ad scribendum offerant, ut ipsa copia difficultatem pariat; Et præclare factorum multitudo delectum non concedat; Cautius est religiosè ea silentiò venerari, quàm tenui atque confusâ narratione scribendi infantiam prodere. Quâ in re etiam optimè est à nobis meritis *Divinus Vir*, quod inter pias meditationes, quibus ad instantem mortem se quotidie præparabat, accuratam vitæ suæ narrationem, propriâ manu conscriptam, nobis reliquerit. Quam totidem verbis hæc referemus.

HENRICUS FUIREN

Anno c^{lo} b^o cxiv, 28. Maji, nascitur Hafniæ, Parentibus GEORGIO FUIREN, Medicinæ Doctore, & MARGARETA FINCKE. 2. Junii in æde D. Nicolai dicatâ baptizatur. Crescente ætate, primùm in Paternis, postea in Viri Clarissimi, Doct. CASPARI BARTHOLINI ædibus, à Præceptoribus domesticis artium liberalium haurit fundamenta. Anno C^{lo} b^o c^o xxix, 9. Junii civitate Academicâ donatur à Decano

no Spectabili M. JOHANNÉ ERASMIO BROCH-
 MAND ; Magnifico tunc temporis Rectore Academiæ
 Hafniensis, Doct. OLAO WORMIO; Et privatum
 Præceptorem elegit Avum Maternum , Doct. THO-
 MAM FINCHIUM. Post semiannum, & Patre,
 & Avo Paterno orbatur. Anno clō lōc xxix, 31 Ju-
 lii, sæviente in Pariâ pestifera lue, *Soram*, locum Viro
 Cl. Doct. *Casparo Bartholino* tunc temporis lethalem, se
 confert ; Ubi binos saltem transegit menses. Post dy-
 senteriam namque periculosissimam, quâ ibi laboraverat,
 ad suos redit ; Studiisq; prioribus Medicinam adjungere
 cœpit. Anno clō lōc xxxiii, 24. Augusti, jactis jam
 studiorum fundamentis, exteros invisurus, *Lugdunen-*
ses in Batavia, 15. Octobris, salutat Musas. Rece-
 ptus autem in album Studioforum, Medico studio, cui
 se totum dicaverat, Mathematicum, tanquam *παιεργον*,
 per biennium adjungit ; Cujus initia ab Avo Materno,
 Doct. THOMA FINCKIO, & ab Avunculo, M.
 JACOBO FINCKE, in Patria gustaverat. Geniô ta-
 men aliud suadente, Medicinam solum in posterum ex-
 colendam sibi proposuit, tam publicis, quàm privatis
 Professorum lectionibus & exercitiis. Excellentissimum
 igitur *Joannem Waleum*, Virum industrium & ingenio-
 sissimum, inter primos, tanquam manuductorem sum-
 mum habuit. *Adrianum Falckenburgium*, ac *Otho-*
nem Heurnium, in Anatomicis ; *Adolphum Vorstium*,
 in Botanicis, Præceptores coluit. Tempus feriarum Aca-
 demicarum in visitandis ceteris *Belgii* tum Provinciis,
 tum Civitatibus impendit. Anno clō lōc xxxv, feces-
 sum in *Frisiam* meditatur ob pestem *Lugduni Batavo-*
rum, vehementissimè sævientem, Ne fratrem suum
 THOMAM FUIREN, qui nuper *Amstelrodamum*
 appulerat, in periculum ab aëre infecto duceret, qui
 meli-

meliori affuetus erat. 26 Octobris igitur *Franequeram*
 cum Fratre ingressus, trimestre ibi consumpsit spatium;
 Non sine Popularem quorundam importunâ molestiâ;
 a quorum conversatione vita eorundem vitiis satis de-
 dita eum deterruit. Sedatâ lue, 25. Januarj, anni se-
 quentis, *Lugdunum* cum Fratre redit. Exactò denuo
 ibidem fere bienniò, 5 scil. Octobris clò loc xxxvii,
 post quatuor annorum in *Belgio* moram, iter in *Galliam*
 cum Achate suo suscipit. Quò, paucis interpositis die-
 bus, pervenit, *Lutetiamq; Parisorum* salutat; Ubi Ana-
 tomicum studium, *Lugduni Batavorum* coeptum, tum
 publicis, tum privatis continuat exercitiis, disputationi-
 bus Medicis rarò neglectis. Tempore verò æstivò, ces-
 sante scil. Facultate Medicâ ab exercitiis publicis, excur-
 siones facit *Bituriges & Aureliam* versus, ac ad reliquas
Ligeri adjacentes civitates. Quibus perlustratis, *Lute-
tiam* redit; Coeptaq; sequenti hyeme, pari tramite, con-
 tinuat studia. Annum cum dimidiò in *Galliâ* hâc ra-
 tione cum transegißet, 15 Aprilis, clò loc xxxix, iter in
Italiam cum Fratre ingressurus, *Monspeffulum*, celebre ha-
 stenus Hygieiæ habitaculum, prius invisendum statuit.
 Perlustratis itaque, quæ in itinere occurrebant civitati-
 bus, *Novioduno* scil. *Lugduno*, *Valentia*, *Arausione*,
Avenione, & *Nemauso*, cò tandem qvum pervenisset, ne
 insalutatis Medicinæ antesignanis discederet, amicitiam
 sibi tum *Ranchini*, Medici scriptis clarissimi, Academi-
 æq; Cancellarii; Tum *Bellovali*, Botanici præstantissi-
 mi, conciliavit. Horum tamen familiaritate diu frui iti-
 neris vetuit ratio. *Masfiliam* igitur, post aliquot di-
 erum intervallum, visis prius *Arelate & Aquis Sextiis*,
 qvum appulisset, iter terrestre Cannam versus continu-
 at. Ubi scaphæ se committens, *Ligusticum mare* tran-
 sit, moxq; *Genuam* salutat. Ubi aliquot dierum spaci-

D

um

um emensus, itineri denuo seaccingit, quò per *Liburnum*, *Pisas*, *Florentiam*, *Bononiam*, & *Rhodigium* factò, *Patavium* tandem, tanquam itineris metam, 9. Junii, ingreditur. Cujus loci genius adeò arrisit, ut sex annos, quibus ibi commoratus, minimè suffecisse autumaret; Nec illinc discessisset, nisi amicorum vota pondus apud ipsum habuissent. Ibi namque vix quidquam desideratur, quod Medico futuro opus est, sive Theoriam, sive Praxin, idq; vel privatis, vel publicis exercitiis, desideres. Anatomica nunquam majori fervore tractavit, quàm ibi. Non contentus enim publicis Cl. *Veslingii* dissectionibus, privatis etiam in ædibus, imò in valetudinario Patavino manum operi adhibuit, viam monstrante Anatomicò laboriosissimò, Cl. *Joanne Leoniceno*. Tempore æstivò, non solum *Veslingium* in horto Academico docentem audivit; Sed ejus comes factus, *Alpes*, plantarum amore, plus quàm unà visitavit vice. In agris invisendis Cl. *Joann. Dominicus Sala* coryphæus ipsi per biennium fuit. Interea tamen, cessantibus scil. publicis exercitiis, anno clò lœc xxxxi, 3 Septembris, *Romam*, *Neapolin*, reliquasq; *Italiæ* civitates invisurus, *Patavium* per trimestre spacium linquit; quod in accuratiori perlustratione *Ferrariæ*, *Bononiæ*, *Ravennæ*, *Arimini*, *Pisauri*, *Anconæ*, *Domus Lauretanæ*, *Maceratæ*, *Romæ*, *Neapolis*, locorumq; illi vicinorum, *Senæ*, *Florentiæ*, *Pisarum*, *Luçæ*, *Pistoriæ*, consumpsit; non sine antiquitatum, rerumq; naturalium admiratione. *Patavium* 10 Novembris reversus, ad solita etiam redit exercitia; Quibus ad 10 usque Junii, anni clò lœc xlv, invigilat. Hòc namque die, iter *Basileam* versus incipit, cum Fratre suo THEODORO FUIREN, & Consobrinò THOMA BARTHOLINO; Mæstus tamen, quòd inter plures, quibus valedicendum erat, & *Joannem Rhodigium*,

dium, Civem & amicum suum non uno nomine colendum, relinquere oportuerit. Itinere igitur per *Par-mam*, *Placentiam*, *Mediolanum*, *Helvetiâq;* aliquot civitates factò, *Basileam* 28 Junii ingreditur. Ubi Medicæ Facultatis Proceres, post quatuor mensium moram, non solum Laureâ Appollinari eum decorarunt, Promotore Viro Cl. *Joann. Casparo Baubino*; Sed etiam inter Collegas Facultatis Medicæ Basileensis numerandum receperunt. Hisce, cum Consobрино Doct. THOMA BARTHOLINO, macte honoribus in *Galliam* denuo tendit; qvum iter per *Germaniam* militum turba, utpote quibus lex est in armis, dissuaderet. Relictâ igitur *Basileâ*, 4. Novembris, *Solodurum*, *Bernam*, *Gene-vam*, *Lugdunum*, & *Aureliam* transiens, *Lutetiam* 7. Decembris ingreditur. Ubi tempus hybèrnum, tum Anatomicis demonstrationibus, tum disputationibus Medicicis auscultandis consumit, ad octavum usque Februarii diem anni sequentis. Illinc namque discedens, ad *Cale-tum* portum se confert; Hincq; in *Hollandiam* tendens, *Flisingam* appulit; Moxq; peragrata *Zelandiâ*, *Lugdu-num Batavorum* 2. Martii redit; lætus quòd, quos olim Præceptores habuerat, omnes adhuc sanos inveniret. Quorum familiaritate usus ad 2. Augusti usque, transactâ scil. apud eos totâ propemodum æstate, reditum in Patriam meditatur. *Amstelredamum* igitur se confert, ubi suppellectilis suæ in Patriam mittendæ cura eum per octiduum detinuit. Expeditus ab his negotiis, itinere terrestri per *Frisiam* utramque, per *Episcopatum Bremen-sem*, per *ditionem Hambugensium*, ac per *Holsatiam* factò, 30 Septembris, Paternos, quos tredecim Annorum spacio non viderat, salutat Penates. Atque hæc ex Defuncti manuscripto desumta in publicum conspectum protulimus; tantò quidem libentiùs, quod iis nihil pu-

rius, nihil ab affectato sermone alienius. Utinam Sanctissimum Virum, qui, quæ optari à quoquam possunt virtutis instrumenta, summa habuit omnia, nobis non abstulisset irata peccatis nostris Divina Justitia. Ex iis Parentibus ortum ducebat, apud quos nihil unquam inventum, quod reprehendi jure possit. Abfuit semper ab eâ domo desidia, luxuria, improbitas, & quidquid vitiorum nomine efferri potest. Eluxit frugalitas, pudor, simplicitas, temperantia, castitas, fides. Viguit ibi, ut de *Apj cæci* domo dictum olim legimus, mos Patrius & disciplina. Istâ sanctitate ad laudabilia Majorum instituta educatus, & probatissimis moribus imbutus tenellus animus, ita ingenio doctrinam, doctrinâ ætatem vicit, ut quarto decimò ætatis annò dignissimus fuerit judicatus, qui Academicorum Civium privilegiis donaretur. Mox luculentiùs cœpit se exserere illud summorum Medicorum *Fuirenio-Finckianum* semen, quod felici conjugio junctum defuncto nostro in naturam venerat. Unde qvum in Medicinæ studio omnes ingenii, ætatis & industriæ nervos collocassèt, mirâ docilitate penitissima Divinæ Artis arcana penetravit. Perspecti porrò magis magisq; innocentissimi mores, & audita summa eruditio celebre atque illustre ipsi nomen reddiderunt. Hinc factum, quòd *Patavii*, consentientibus inclytæ Germanicæ Nationis votis, tum Bibliothecarii, tum Consiliarii munia, ipsi sint commissâ; Quibus ita præfuit, ut universa natio, ob benè gestam Rempublicam, summis cum honoribus sit prosequuta. Virtutes, quibus omnium ora atque oculos in se convertit, tam eximie sunt, ut qui eas sibi velit laudandas suscipere, magnitudine & splendore oppressus, cogatur ingenii sui tenuitatem fateri. Etenim, quæ parva sunt & vulgaria, sub stili acumen facilè cadunt; qvum magna & singul-

ria

ria oratoris ingenium obruant. Et quemadmodum in cæteris virtutibus plerosque mortales antecessit, ita in beneficentia, quâ ad DEUM homines maximè accedere *Pythagoræ* dicebantur, se ipse superavit. Etenim, ut nihil dicamus de liberalitate erga pauperes, quæ ipsi erat quotidie in usu; magnam pecuniæ summam, cujus usuram quotannis distribui voluit, tum iis qui cum rei familiaris penuriâ conflictantur, quosq; morbus lecto detinet; Tum nautis, qui in operâ, pro Rege & Patriâ, susceptâ membris mutilantur, legavit. Etiam immensam, & nunquam satis deprædicandam iniit ab Ecclesia & à Regia hac Universitate gratiam, dum egenis juvenibus, qui in Scholâ Deiparæ Virginis se studiis consecrârunt; Et Studiosis inopiâ pressis; Tum duobus templis, quorum alterum à D. Nicolao, alterum concionalibus Studiosorum exercitiis dicatum à Sacrosancta Trinitate habet nomen; Et pauperum Sacerdotum viduis in Selandicâ Diœcesi cœlibem vitam agentibus, ingentem pecuniam legavit; Et Academico Sub-Bibliothecario annui stipendii augmentum dedit. Præterea Regiæ huic Universitati Bibliothecam, quam habuit magnâ omnis generis librorum copiâ ornatissimam, donavit; Ut & universum thesaurum mineralium, fossilium, rerumq; naturalium, quas propter raritatem paucis cognitas aut visas ipse, quâ erat in re Medicâ singulari scientiâ, summô studiô, magnôq; precio conquiſſeverat. Etiam in testamento voluit, ut *Museum Anatomicum* aliquot centenis Imperialibus frueretur. Cui jam ante complures annos dono dederat *Tabulas Anatomicas*, stupendæ artis opus, à se concinnatus; in quibus omnes humani corporis nervi, venæ, arteriæ, homini cuidam olim vitalia, cernuntur tam subtiliter affixa, ut non sine summa admiratione spectari possint; tamq; ar-

tificioſe , æmulante naturam arte , elaborata , ut à putredine corruptio iis afferri vix poſſit. Donum fanè quod tantò digniori in precio habendum quantò majori cum ſtudio eſt compoſitum , cuiq; ſimile nullum aliud in Septentrione unquam viſum , neque in *Galliis* , *Germania* , *Belgio* , oſtendi poteſt. Hæc ſingularis & propè incredibile munificentia tanta eſt , ut à dicendi Magiſtris extolli dignè nequeat , eamq; ſummis laudibus multò ſuperiorem eſſe fateatur ipſa eloquentia. Ex hiſce virtutibus quamvis nullam laudem ſibi tributam voluit Cœleſtiſſimus Defunctus , qui ſolo Divinæ gloriæ amore , verâq; erga proximum charitate in omnibus actibus ferebatur , nihilq; aliud quærebat , quàm benè pièq; factorum conſcientiam ; Tamen qvum æternam animi gratitudinem mereantur tam ſtupenda beneficia , ad omnis poſteritatis memoriam propagari debet ſingularis ejus & inaudita munificentia. Luctatus jam erat per aliquot annos Divinus Vir cum infirmiore valetudine ; Quæ , quamvis debilitata aliquo tempore & ſuppreſſa videbatur , tamen , quod nullâ aut vitæ ratione , aut medicamentorum vi repelli poſſet , vivendi finem attulit. Neque ad tollendum morbum ulli labori pepercit Vir Experiendiſſimus , **D. PAULUS MOTH** , Regiæ Aulæ Medicus ; quem Defunctus noſter , ut olim Præceptorem , ita nunc amicum conjunctiſſimum , omni honoris genere proſequabatur. Infirmiſſimam cum animi tranquillitate , atque Divino Beneplacito voluntatem ſuam ſubjiciens , poſtquam à Religioſiſſimo Viro , **M. JOHANNÉ ENV. BROCHMAND** , impetratâ peccatorum remiſſione , eſſet ſalutari Servatoris Corporis & Sangvinis Sacramento reſectus , ſupplex precabatur , ut , ſi diuturnum eſſe juberet hunc morbum

Di-

Divina Majestas, simul patientiam usque ad extremum spiritum largiri dignaretur. Mox exauditus, absque omni doloris sensu, octavò Januarii die, animam Servatori tradidit, quæ annos quatuor & quadraginta, menses septem, dies decem, erat in terreno corpore peregrinata. Vos Cives Academici, quod Divini Defuncti, Matris, Fratris, Sororis, Familiæ, Amicorum æterna merita jure quodam suò à vobis possunt exigere, tam Cœlestis Viri, in quo omnis ætas, omnisq; ordo habet quod sibi ad imitandum proponat, funus hodie horâ primâ, summâ cum frequentiâ deducite, & gratam beneficiorum memoriam, debitamq; immensis meritis reverentiam, dum vita supereft, declarete. Valete, peregrinationis vestræ memores. P. P. Hauniæ, Feriâ sextâ, XIX Kal. Febr. Anno Æræ CHR. clo lcc LIX.

Sub Rectoralis Officij Sigillo.

TH. BAR-

TH. BARTHOLINI

Epigrammata

In Obitum

D. D. Henrici Fuiren.

I.

In Bibliothecam & Musæum Rario-
rum D. Fuirenii.



*Ublica dum vitæ surgunt monumen-
ta futurae,
Atq; per immensum Bibliotheca
patet :
Dumq; ad præclaros currit Natura penates,
Quicquid hic augustus, qua patet, orbis habet;
FUIREN, delictum gentis, dum vindicat
ægros,
Immemor heic artis jam perit ille suæ.
Sancta tamen pietas, profugi reverentia recti
Vivit, & æternum quod veneremur erit.
Dum*

33

*Dum fuerint ægri, dum se Natura fatetur,
Dum Dominum agnoscit Bibliotheca suum.*

II.

In tabellas venarum, Arteriarum &
Nervorum D. Fuiireonii.

*Mortua nervosas depingunt fila tabellas,
Atque peregrino corpore vena fluit.
Frigida sed torpent vitali priva calore,
Destituit nervos spiritus, aura fibras.
Tandem ex FUIREONIO surgit decus,
atq; tabellis
Surgit honor, siccis jam sua vita redit.*

III.

De iisdem vasis ex uno cadavere
excisis, & quatuor tabulis
illitis.

*Unus eram, nunc plura replent mihi viscera lignum,
Atq; novos lambit vena quaterna sinus.
Dum fuerant vitæ nexu conjuncta, cadebant;
Heic exsucca vigent corpora, fluxa manent.*

E

De

I V.

De D. Fuirenio in urbis obsidione
defuncto.

*Dum patriæ obsessos cingunt infensa penates
 Signa, per insolitas exitiosa vias,
 Non potuit clausos urbis perferre recessus
 Assuetus cælo liberiore frui.
 Mutat mente domos, urbisq; & pectoris orbem
 Deserit, auxilio Numinis alta petens.
 Sic licet hostiles includant mœnia turmæ,
 Claudere nulla animos vis inimica potest.*

V.

De eodem circa anni initium de-
nato.

*Iratus vitiis, perituro infensior ævo,
 Fastidit nostros connumerare dies.
 Anni principium nobis fecere Calendæ,
 Olli, cui spirant secula, finis erant.*

Epi-

VI.
Epitaphium.

VIATOR QVI TRANSIS
HENRICUM FUIREN

FAMILIÆ DECUS
SOLATIUM ÆGRORUM
NOBISCUM DEPLORA LACHRYMIS.

QVI
LONGIS ANNORUM PEREGRINATIONIBUS
ANIMO SEMPER QUIETUS
VITA EXPRESSIT QVOD FAMÆ FUGA
NOLUIT ELOQVI
CLARUS ERUDITIONE QVAM OCCULTA-
VIT MODESTIA

QVUM NIHIL OSTENTARET OMNIA POS-
SEDIT

VIRTUTEM SOLAM DISSIMULARE
nescius ET CANDOREM
DUM PATRIÆ DUM AMICIS DUM EGENIS
VIXIT

QVI PER ILLUM SEMPER VIVUNT
DUM MORITUR PER NATURAM PER ME-
RITA VIVIT

PER DEVM QVEM COLVIT

CUM

CUM DEO VIVIT IN ÆTERNITATE.
 VIXIT HACTENUS INTER MORTALES
 ANN. XLIV. MENS. VII. DIES X.
 PERPETUA APUD PLURES
 FAMA SUPERSTES.
 ABI VIATOR
 ET
 MORTUO LEVEM
 QUÆ VIVO GRAVIS
 PRECARE TERRAM.


VII.
 In Catalogum Bibliothecæ Fuiarenianæ.

*Librorum titulos defuncti pagina monstrat,
 Vera sed in vivo Bibliotheca fuit.*



1.6-242

1-6-242



0056438.19
0056438.18

16